

8

*Q. D. B. F.*

DISSERTATIO INAUGURALIS

DE

CESSATIONE  
SC<sup>TI</sup> MACEDONIANI

QUAM

*SOSPITANTE DIVINO NUMINE*

IN REGIA ARGENTORATENSIVM

UNIVERSITATE

CONSENTIENTE MAGNIFICA

FACVLTATE JVRIDICA

*SINE PRÆSIDE*

PRO LICENTIA

SUMMOS IN UTROQUE JURE HONORES

DOCTORALES CAPESCENDI

SOLENNI ERUDITORVM CENSVRÆ

AD DIEM 26 OCTOB<sup>RI</sup>S ANNO MDCCXXXVII

SUBJICIET

FRANCISCVS IGNATIVS WEIS,

DIEBOLSHEMIO-ALSATA.



Typis MELCHIORIS PAUSCHINGERI, Typogr.

*Reverendissimis , Perillustribus ,  
atque Generosissimis*

DOMINIS  
S. R. I. EQVITIBVS  
HÆREDITARIIS  
AB ET IN ANDLAV  
VIRIS

OB ANTIQVITATEM STEMMATIS, ET MAXIMA  
IN RE ECCLESIASTICA , MILITARI ATQVE  
CIVILI MERITA VNDIQVAQVE  
EMINENTIBVS

DOMINIS SVIS GRATIO-  
SISSIMIS

HOC QVALECVNQUE STVDIORVM SVORVM  
SPECIMEN  
OB IMMENSE

IN PARENTEM ET SE COLLATA BENEFICIA  
CEV DEBITVM PIETATIS GRATIQVE ANIMI MONV-  
MENTVM IN VITERIOREM SVI COMMENDATIONEM

EA , QVA PAR EST, MENTIS VENERATIONE

SACRVM ESSE JV BET

PERILLVSTRIS ANDLAVIANI NOMINIS

*Admirator & Cultor subiectissimus*

FRANC. IGNATIVS WEIS,  
Dieboldshemio - Allata,



DISSERTATIO INAUGURALIS JURIDICA  
DE  
CESSATIONE SCI MACEDO-  
NIANI.

§. I.



Alutem Reipublicæ supremam legem esse nemo abnuet, nisi qui forte domi hospes ac peregrinus plane extiterit. Recte itaque omnibus illis, qui ad urbium, provinciarum, regnorumque gubernacula sedent, incumbit, ut oppressis jus administrent, probos protegant, malos compescant, subditis suis quietem procurent, talesque semper leges ferant, quæ salutem civium promovent, promotam stabiliunt atque stabilitam tuerentur. Inter ejusmodi salutare Reipublicæ constitutiones

summo jure referri potest & SENATUS CONSULTUM MACEDONIANUM, quod non tantum Parentum auctoritati & securitati prospexit, sed & coereuit malitiam atque improbitatem sceneratorum, qui mutuatitia sua pecunia filios familias ad vitam luxuriosam seducebant, publicam disciplinam corrumpebant, amplumque peccandi campum malis moribus, insidiisque vitæ parentum aperiebant.

§. II.

Est autem SCtum MACEDONIANUM beneficium *Juris Civilis*, quod prohibet, ne filiusfam. absque consensu Patris mutuat pecuniam accipiens valide exinde obligetur. Quod si itaque Creditor contra hoc SCtum filiosfam. crediderit, denegatur ipsi actio tam adversus filium filiamve, Nepotem, Neptemve, sive adhuc in potestate sint, sive postea morte parentis vel emancipatione sui juris esse cœperint, quam adversus Patrem, Avumve. §. 7. *J. quod cum eo, qui in aliena potestate est. L. 1. L. 3. ff. de SCto Maced.* Quamobrem si Creditor pecuniam creditam à talibus personis repetere velit, opponitur ipsi Exceptio SCti Macedoniani, quæ est exceptio perpetua, realis, peremptoria, qua excluditur intentio ejus, à quo mutuat pecuniam filiusfam. contra SCtum hoc accepit. Licet autem per hanc exceptionem intentio.

tio creditoris elidi possit, dantur tamen nihilominus casus, in quibus SCtum Macedonianum vim suam perdit atque cessat. De quibus impræsentiarum mentionem facere proposuimus.

### §. III.

Cessat vero hujus SCti Macedoniani exceptio variis modis, nimirum vel intuitu *Dantis*, vel *Accipientis*, vel *Patris*, vel *Objecti*. Ex persona *Dantis* seu *Creditoris* non valet, si creditores facultatem mutuum dandi non habent, e. g. Pupilli, *L. 3. §. 2. ff. de SCto Maced.* His credentibus succurritur duplici modo; aut enim dederunt Pupilli mutuum pecuniam filiosam, sine *auctoritate tutoris*, aut *eo consentiente*. Illo casu ipso jure Pupilli tuti sunt, & licet alteri crediderint pecuniam, pecunia tamen non sit mutua; nisi auctoritas tutoris interponatur. Nam cum mutuum, in quo transferatur dominium, species alienationis sit, & pupilli sine auctoritate tutorum alienare nequam possint, dominium in filiosam, accipientem non transferetur, sed pecunia adhuc extans vindicari potest §. *ult. ff. de quibus alien. lites*. Quod si vero jam consumpta, conditione repetere possunt sine ullo metu exceptionis SCti Maced. *L. 19. in f. ff. de Reb. cred.* Quid autem dicendum, si tutoris auctoritas interposita fuerit? Respondetur, Pupilli ex capite minorennitatis contra SCtum adjuvabuntur *L. 12. §. f. ff. de Minoribus*.

§. IV.

Eodem beneficio fruuntur etiam Minores, qui vel sine vel cum consensu Curatorum filiosam pecuniam mutuam credunt. Quod si autem Curatorem non habent, tunc videndum, utrum filiosam. etiam *minori*, an vero *majori* pecuniam dederint. Priori casu, si à minore creditum fuerit etiam minori, rursus videndum erit, utrum pecunia credita penes minorem debitorem adhuc salva existat, aut tempore litis contestatæ exinde inveniatur locupletior, vel non. Illo casu potior erit causa creditoris minoris *L. 34. pr. ff. de Minor.* quoniam, si duo privilegiati concurrunt, & unus de damno vitando, & alter de lucro captando certat, is præferri debet, qui de damno vitando agit. *MANTICA de ambig. conv. L. 8. s. 7. n. 26.* Hoc vero casu si minor debitor pecuniam à minore creditore mutuo acceptam jam consumserit, tunc in pari causa melior erit conditio consummentis vel dilapidantis, in *d. l. §. 6. L. 34 ff de minor. L. 128. pr. ff de R. l.* Id quod decantatum Juris axioma probat: nempe: *Privilegiatus contra aequi privilegiatum non gaudet privilegio suo.* Hinc pecunia credita non alias condici potest, quam si versa sit in rem accipientis, aut minor creditor probare posset, se à minore debitore callide vel dolose deceptum fuisse; hoc enim casu creditori minori per restitutionem in integrum

grum succurrendum esse dicam , quoniam malitia supplet ætatem. vid. *MOZZ. in Cont. Minuæ de Personis. n. 11. & seqq.*

§. V.

Posteriori casu Minor pecuniam mutuam dans filiosam. majori securus est propter restitutionem in integrum , & magis ætatis ratio , quam SCti Macedoniani hoc in casu consideratur *L. 11. §. f. ff. de Minor.* Ratio hæc est, quod SCTum hac ex parte odiosum, illa vero per omnia favorabilis dicitur , præsertim cum ob immaturitatem & imbecillitatem Judicii minoribus Jus ignorare liceat , consequenter ex hoc capite ei subveniendum erit, ut non videatur filiosam. credidisse. *L. 9. ff. de Jur. & fact. ignor.* Quæ cum ita sint, contrarium dicendum erit , si minor creditor scivit beneficium SCti Macedoniani ejusque efficaciam , & tamen filiosam. credidit. Quo casu talis minor creditor repellendus est, nec auxilium vel levamen præbent prædicta *L. 9. ff. de Juris & fact. ignor. & L. 3. §. 2. ff. de SCto Maced.* quippe quæ ignorantiam minoris præsupponunt.

§. VI.

*Secundo* nullum locum habet exceptio hæc, si filiosam. sit mutuans & mutuatus pecuniam paternam, quoniam nullum jus hac de re disponendi

di & alienandi habet. Idem dicendum est, si fortitan ex peculio profectitio alii filiosam, certam pecuniæ summam credidit; Hæc enim pecunia non fit accipientis, quia licet ipsi libera administratio peculii profectitii à patre permessa sit, tamen huic non videtur esse concessum pecuniam mutuam ex peculio dare, hoc enim est perdere. Cum itaque filiosam, peculium suum dilapidare permissum non sit à Patre *L. 7. pr. ff. de donat.* utique etiam pecunia illa mutuo data, si adhuc extat, à Patre vindicari poterit. *L. 3 §. 2. ff. de SCto Maced.* An vero consumpta condici possit? alia quæstio est; Plerique cum BARBOSA *ad L. 2. C. ad SCtum Maced. n. 31.* ANTON. MATTH. *Disp. de Oblig. 9 §. 4.* & GODOFRD. DE JENA *in tract. de SCto Maced. Sect. 5. Aphor. 1. n. 11.* eam non sine ratione affirmant.

### §. VII.

*Tertio ex persona dantis eliditur hæc SCti Maced. exceptio, si frater fratri mutuam dedit, & uterque in ejusdem Patris potestate existit. L. 38. ff. de conducl. indeb. & §. 6. j. de Inut. stipul.* Ratio autem, quam vulgo Doctores Juris afferunt, non videtur esse adæquata; Dicunt enim, ea ex causa cessare hoc in casu SCtum Macedonianum, quoniam à fratre nulla fraus, nullaque calliditas erga fratrem committi potest, quam quæ ab extraneo Creditore; vid. DUENN. *Reg. 369. n. 1.*

MAN.



MANTICA *de Tacit. & ambig. convent. Lib. 8. c. 7. n. 35.* Mihi videtur sequentem rationem decidendi allegari posse ; quoniam uterque contrahens ejusdem potestati & voluntati subest, adeoque alter alteri civiliter non obligatur. vid. STRUV. *Synagm. Civ. Exerc. 6. ib. 42.* Hinc contrarium dicendum erit, si frater emancipatus fratri suo in patria potestate adhuc constituto mutuetur pecuniam, hoc enim casu illi SCrum Macedonianum opponi posse non dubitant Jurisconsulti.

§. VIII.

*Quarto* ex qualitate Creditoris tolli potest eadem Exceptio, si Creditor justo errore ductus putaverit, debitorem esse patremfam. quoniam error communis excusat creditorem, qui in eo errore fuit *L. 1. C. ad SCrum Maced.* imprimis cum jura ad id, ut hoc SCrum locum habeat, in creditore requirant, ut conditionem debitoris sciat *L. 3. §. 1. & L. pen. ff. eodem.* Quamobrem incumbit Creditori, qui vult assequi hoc, quod mutuo dedit filiofam. ut hanc suam probabilem credulitatem probet, & doceat, se non vana simplicitate & juris ignorantia deceptum esse, *L. 1. C. eod.* Ratio est, quod is, qui fundamentum intentionis constituit in allegatione ignorantie, eam probare debet, alias facile foret allegare & elidere SCrum hoc, præsertim cum emancipatio & alii modi tol-  
B lendi

lendi Patriam potestatem sint res facti, quæ in dubio non præsumuntur, & probari debent. vid. CHRISTIANÆUS in Vol. 3. Dec. 35. n. 7. Moribus hodiernis reputatur quis sui juris esse, non ex certo temporis spatio, sed communiter pro Patrefam. habetur, si vel sua seorsim agat, & matrimonio contracto peculiarem œconomiam aut propriam negotiationem instituat, aut vectigalia publica conductâ habeat. His probatis adimetur contra filiumfam. beneficium SCti hujus, præsertim si ipse se patrefam. mentitus sit. Ex his patet, quod omni Creditori, qui scivit, aut scire potuit debitorem suum esse filiumfam. semper obstat exceptio SCti Maced. vid. STRUV. *Synagm. Jur. Civ. Exerc. 3. th. 68.*

§. IX.

Quid si autem duo sint Rei Credendi, quorum unus scivit, vel scire potuit, alter vero iusta ignorantia ductus ignoravit, debitorem esse sub potestate patria, quæritur, an unius scientia nocet alterius iusto errori, ita ut nihilominus utriusque exceptio hujus SCti opponi possit? Respondetur, unius scientiam nocere ambobus in odium creditoris legimus in L. 7. §. 7. ff. de SCto Maced. & propter conjunctionem obligationis L. 2. ff. §. 1. J. de duobus reis. Verum concedendum esse hoc existimo, si conjunctim crediderint ex una massa

massa seu communi pecunia, quam ex certa negotiatione lucrati sunt, vel terrestri, vel maritima, quia tum in causa communi alter alterum admonere debebat. Res vero aliter sese habet, si duo uno eodemque tempore disjunctim mutuum eidem concesserint; nemo enim extra casum societatis adstrictus est, alterum præcise dere sua admonere aut eidem negotii privati gesti rationes & causas reddere. Hinc dicendum in hoc casu neutrum alterum ad se trahere, sed ignorantia proderit erranti, & scientia oberit scienti. Insuper in *L. 7. §. 7. ff. eod.* alius plane casus exhibetur, in quo exceptio SCti Maced. locum habet, loquitur enim ista lex duobus correis debendis, de quibus in paragrapho sequenti dicam.

#### §. X.

Quæritur, quid statuendum sit, si duobus filiisfam. creditor pecuniam mutuam dederit, quorum unum patremfam. esse probabili ratione putavit, alterum vero filiumfam. esse scivit? Regulariter DD. cum BRUNNEMANNO ad *L. 7. §. 8. ff. de SCto Maced.* videndum esse dicunt, ad quem pecunia pervenerit, si ad illum, quem filiumfam. esse scivit, valide opponi posse Exceptionem hujus SCti statuunt, secus vero, si ad eum, qui filiusfam. probabiliter putabatur. Inveniuntur tamen quidam, qui in hisce casibus ad verisimilem opinionem creditoris admittendam exigunt, ut filiusfam.

liusfam. per decennium pro patrefam. se gesseris, vel habitus fuerit, idque cum BARTOL., BARDO. & aliis sentiunt TRENTACINQ. *Lib. 3. Resol. 19. de solut. n. 10.* & ZANGER. *de Exceptionibus P. 3. c. 12. n. 28.* Quod tamen dictus TRENTACINQ. *d. l.* limitat, ut non procedat, si filiusfam. simul asseruerit se esse Patremfam. Verum circumstantiam hanc temporis nullius momenti esse credam cum MENOCH. *L. 6. Prasumpt. 55. n. 28.* & WESSEMBECIO *in Comment. ad Cod.* quoniam in iure nostro certus annorum numerus non sit determinatus; sufficit itaque tales actus ab aliquo gestos esse, qui non nisi à Patrefam. fieri solent, & Creditorem non fuisse in vana simplicitate aut juris ignorantia. vide plura apud GODOFREDUM DE JENA *dicto tract. Sect. 5. Aphor. 3.*

## §. XI.

*Quinto* denegatur beneficium SCti Macedoniani filiosfam. debitori, si Creditores in fraudem & præjudicium tertii pecuniam mutuam dederunt. Sic si libertus in fraudem Patroni pecuniam crediderit, exceptio SCti locum non obtinebit, quoniam magis donasse, quam contra SCtum. Maced. credidisse censendus est. Idcirco Patronus illam pecuniam non quidem ut mutuam condicere, sed ut rem contra leges alienatam actione Faviana repetere potest *L. 6. & 7. ff. §. quid*

*quid in fraudem Patroni* Eadem quoque locum inveniunt in omnibus eis casibus, ubi in fraudem Creditorum debitores res suas aliis mutuo præbent, habemus enim ideo actionem Paulianam in jure nostro saluberrime introductam, ut tales res in fraudem creditorum alienatæ revocari possint.

§. XII.

Hactenus diximus de modis, in quibus cessat SCtum Meceдонianum ex parte Dantis seu creditoris; transeamus nunc ad alteram classẽ, & videamus, quando idem beneficium rejiciatur ex qualitate *Accipientis* seu *Filiifamilias*. Et primo quidem dicendum est, quod ex hac ratione validum non sit hoc beneficium, si nimirum filiusfamilias castrense peculium habeat. *L. 1. §. f. L. 2. ff. de SCto Maced.* Ratio hæc allegari potest, quoniam in hoc peculio vice patris fungitur ob favorem militiæ *L. 3. C. de Castrens. Pecul. Mil.* *L. 1. §. 15. ff. de Collat.* Ergo ibi libere contrahere potest usque ad quantitatem peculii *L. 2. ff. ad SCtum Maced.* Hoc deinde per specialem constitutionem Imperatoris Justiniani in *L. ult. §. 1. C. cod. ad quemvis filiumfam.* qui miles est, extensum fuit; Dicit enim Imperator: Si filiusfam. miles pecuniam mutuam acciperit sive sine mandato sive cum consensu seu ratihabitione Patris stare oportet contractum.

tractum, nulla differentia introducenda, ob quam causam pecunia credita, vel ob quem finem consumta sit, five habeat peculium castrense vel non. Miles enim est à patria potestate liberatus non quidem personaliter §. 4. *§. quibus modis Patria Potest.* sed respectu contractuum & negotiorum, quæ tanquam miles in militia gerit. Nec adest Jure Rom. præsumtio, istum in aliam causam nummos accepisse, quam in causas castrenses, quoniam miles, quem longæ & incertæ à penatibus Patriis peregrinationes subjicere variis improvisque necessitatibus solent, non habebat occasionem luxuriæ, sed sub gravi disciplina stabat. Accedit & illud, ut facilius & citius tempore belli pecuniam invenire possint. Quæritur autem, an hodiernis moribus, licet severa illa disciplina quoad præcavendam luxuriam exoleverit, hoc adhuc in viridi observantia sit? Dici debet quod non, interim tamen testantur duo Responsa Juridica contrarium, Alterum est *Facultatis Jenensis de anno 1628.* teste RICHTERO *in Cent. reg. 1. n. 18.* Alterum *Facultatis Lipsiensis de anno 1647.* teste PHILIPPI *in usu Pract. ad §. 7. §. quod cum eo &c. Ecloga 61. n. 12.*

### §. XIII.

Idem dicendum venit in militibus cœlestis militiæ & Justitiæ, nempe Clericis, Judicibus, Professoribus, Doctoribus, Advocatis, aliisque similibus personis peculium quasi castrense habentibus.

Quo-

Quoniam, licet non liberentur per talem dignitatem à potestate patria, tamen hoc peculium filiisfam. tanquam patribusfam. præcipuum ac proprium est, & ad instar peculii castrensis effectum suum fortiri debet. Et proinde etiam non aliter cessabit SCtum Macedonianum, quam usque ad quantitatem peculii *L. 2. ff. h. t.* Videatur GRATIANUS *in discept. Forens. cap. 576. n. 3. &c.* An autem hoc in peculio adventitio irregulari, in quo & proprietas & ususfructus filio competit, locum habeat? quæstio est apud JCtos intricatissima, & in qua non unanimis DD. reperitur opinio. Illi, qui negativam fovent sententiam, sequentes movent rationes: 1) quoniam non sola administratio & dispositio rerum suarum libera absque patrisfam. titulo non facit cessare SCtum, constat enim ex jure, quod filiusfam. licet dominium liberrimum hoc in peculio habeat, nihilominus tamen minime titulum patris sibi attribueri possit, sed permaneat sub potestate patria, & licet ratione peculii castrensis & quasi valide mutuum accipere queat, tamen magnam diversitatis rationem inter hoc & illud ponunt. quoniam de illo castrensi & quasi & inter vivos & mortis causa ob favorem militiæ & literarum disponere possunt, de adventitio vero tantum inter vivos. Allegant & in patrociniū suæ sententiæ *L. 1. §. f. ff. de SCto Maced.* in qua dicitur, Beneficium hujus SCti tantum cessare in peculio castrensi & quasi, ideo non

non extendendum ad adventitium irregulare. Verum his non obstantibus mihi magis arridet affirmantium opinio, quæ efficaciam SCti hujus in peculio adventitio irregulari denegar; Et quidem ea ex ratione, quoniam Jure novissimo per Nov. 117. de hoc peculio libera & plenissima disponendi facultas est concessa, ideo dubium non adesse videtur, quin de eo etiam se obligare & mutuum contrahere possit, præsertim cum exinde patri nullum oriatur præjudicium, & ita docent CONANUS *Lib. 7. comm. Jur. Civ. cap. 2.* TRENTACINO *Resol. 19. n. 5.* HOPPIUS *ad § 7. f. quod cum eo* &c. BARBOSA *ad L. 2. C. de SCto Maced. n. 30. aliique.*

#### §. XIV.

*Secundo* non suffragatur SCtum hoc, si mutuum datum sit filio, qui à patria potestate vel per emancipationem, vel per separatam æconomiam liberatus est. *L. 3 §. ult. L. 1. §. 1. ff. h. t.* Quæritur autem, an etiam per dignitatem à patria potestate liberato non patrocinetur hoc beneficium? Respondetur, hac in re DD. rursus variare; Sunt enim, qui volunt hanc exceptionem adhuc admittendam esse, si liberi per dignitatem sui juris facti mutuum contraxerint, & quidem ea ex ratione, quoniam, ut credunt, filiusfam. per dignitatem censetur liberatus à patria potestate saltem quoad odiosa, non vero quoad favorabilia, unde & suus heres manet & beneficium restitutionis in integrum



prum retinet, ita HAHN. *ad Wesenbec. h. 1. n. 5.* & BARBOSA *ad L. 2. C. h. 1.* Verum ego negantium castra sequor, statuens: quod omnis dignitas, quæ patriam potestatem tollit, faciat quoque cessare SCtum Macedonianum. Ratio est clara, quoniam desinunt esse filisfam. & quicquid acquirunt, sibi pleno jure acquirunt, & hinc ære alieno onerati habent, unde solvant. Nec valent argumenta in contrarium allata, quoniam, licet jura familiæ ipsi salva maneant; *Nov. 81. c. 2.* hoc tamen neque ad jura familiæ pertinet, neque in filiorumfam. favorem, sed potius in odium creditorum & securitatem parentum introductum est. *L. 40. ff. de Cond. indeb. L. 9. §. pen. ff. de SCto Maced.* Imo absurdum foret, ut inquit BUSIUS *ad L. 1. §. f. n. 3. ff. eod.* ei privato nomine cum periculo credi, qui negotia Ecclesiæ gravissima vel Reipublicæ gerit. Ita sentiunt PAUL. DE CASTRO in *L. 1. §. f. ff. eod.* WESENBECK. *n. 5. h. 1.* alique, qui præter hanc rationem & alias adhuc adducunt. An vero Principum filii SCto hoc uti possint, quæstio est etiam intricata & ardua. CONANUS & BARBOSA eam negant; Verum cum eadem ratio juris in iis militet, imo majus etiam periculum ex malitia fœneratorum hic Reipublicæ immineat, utique nec Principum filijs hujus SCi auxilium denegandum censeo cum *Celeb. SCHILTERO in Exerc. ad ff. 8. §. 77.*

§. XV.

Quæritur autem, an SCtum hoc cesset in casu, si pater ab hoste captus, & durante captivitate mutuum filius acceperit? Respondetur, cum Jure Romano Patria Potestas interim sit suspensa, adeoque jus liberorum & SCti causa in pendenti erit §. 5. *J. quib. mod. jus Patr.* Quamobrem quamdiu filiusfam. in possessione constitutus est, tamdiu exceptio locum habet, donec ex postfacto constet, an pater redeat jure postliminii, atque tunc fiet perpetua, cum in civitate eum semper fuisse fingatur §. 7. *ead.* Si vero in captivitate mortuus sit pater, tunc beneficium SCti ipsi non proderit, cum ex L. Cornelia censeatur statim a die captivatis mortuus. Hodie vero hæc omnia non observantur, cum captus non reputetur pro servo, & patria potestas quoque non suspendatur. Inde, si in captivitate expiraverit, non à die captivitatis, sed demum à die mortis filius sui juris factus dicitur. Idem dicendum, si pater sit furiosus, & durante furore filius de mutuo contraxit, furor enim patris non impedit SCtum, cum nullibi legatur, furorem Patris esse modum dissolvendi patriam Potestatem, præsertim cum semper causa, ob quam hoc SCtum introductum, locum habere, & filiumfam. patris furiosi vitæ ejusque bonis facilius insidiari possit. Quam sententiam contra BALDUM & TIRAQUELLUM defendit TREN-  
TACINO.

TACINQ. *Resol.* 19. n. 16. per L. 8. ff. de his qui sui  
vel. alie.

§. XVI.

*Tertio* SC*i* Macedoniani favor non prodest,  
si filiusfam. stipulatus quidem sit sibi mutuum dari,  
facta tamen est numeratio, postquam exivit é Pa-  
tria potestate. L. 3 § f ff. h. t. Quando enim dici-  
tur, non licere filiofam. pecuniam mutuam cre-  
dere, illud non ad tempus contractus referendum,  
quoniam mutuum accipientis qualitas considera-  
tur, & requiritur tempore numerationis vid. d. l.  
3. §. f l. 4. s. & 6. ff. h. t. In omnibus enim nego-  
tiis ad initium actus respiciendum est, & licet fi-  
liusfam. adhuc in patria potestate constitutus jam  
paetum inierit de mutuo solvendo, nondum tamen  
contractus mutui erat, quoniam ad ejus perfectio-  
nem requiritur rei traditio. Cum itaque hæc  
demum, postquam sui juris factus est, perfecta,  
sequitur quod in solidum damnandus sit L. 5. ff.  
h. t. Ex eodem fundamento exceptioni locus erit,  
si paterfamilias stipulatus sit sibi mutuum dari,  
postea vero numeratio facta est filiofam. quoniam  
numeratio facta est eo tempore, quo erat sub  
potestate patria, & causæ, ob quas SC*rum* intro-  
ductum, locum habent.

§. XVII.

*Quarto* denegatur vis hujus SC*i*, si filiusfam.  
C 2 mortuo

mortuo patre vel alio modo sui juris factus obligationem agnovit. *L. 2. C. h. t.* Cessat enim periculum patris, & non tam convalescit prior obligatio, quam de novo contracta censetur, cum debuisse rejicere. Fieri autem potest hæc agnitio tribus modis, 1) *Solvendo.* 2) *Accessiones adjiciendo,* 3) *Novando.* Solutione debitum agnoscitur, si vel totum solvatur, vel tantum pars debiti. De illo modo nullum plane dubium est; de hoc vero maximopere inter Doctores controversitur. Assertiva communiter recepta est, quam & ego defendere non vereor, dicens: filiumfam. qui sui jurisfactus, & partem debiti solvit, ad residui quoque solutionem cogi posse. *L. 7. §. f. junct. §. preced. & seq. L. 9. pr. ff. h. t.* quoniam, qui partem debiti solvit, ad quod integrum solvendum naturaliter est obligatus, is videtur agnovisse totum, cum nulla pars intelligi queat, nisi totius, cujus pars sit, & ideo idem est, ac si patrifam. pecunia concedita fuisset. Ita sentiunt LAUTERBACH. in *Coll. ad ff. h. t. §. 21.* BRUNNEM. ad *L. 7. ff. h. t.* PEREZ. *aliique.* Nec valent adversariorum rationes, quas post *Bulgarum* FRANC. CONNANUS *Comment. 2. n. 8.* & BACCHOV. ad *Trenislerum* Vol. 1. *disp. 20. lb. 8. Lit. A & B.* *aliique* afferunt. Primam quidem dubitandi rationem quod attinet, qua verba in *L. 7. §. f. ff. h. t.* non generaliter sed restricte sumta esse volunt: *Cessabis scire*, scilicet quoad summam solutam, quod ex verbis subsequen-  
tibus eliciunt:

ciunt: *nec solum repetere potest*, ex quo non sequatur, ergo residuum solvere debet, ad hanc ita responderi potest. Si paterfam. solverit, cessat SCtum, necessum de eo intelligamus, quod solvendum adhuc restat, quoniam alias nihil interesset, quod paterfam. solverit, cum adhuc in patria potestate constitutus solvens soluti repetitionem non habeat *L. 9. §. ult. & L. 10. ff. de sol. &* quis statueret, filium sui juris factum, quod solvit, repetere posse *L. 40. ff. de Cond. indeb.* Ideo omnino verius est, quod verba, *Cessat SCtum*, necessario ad non solum repetendum & ad residuum, & verba, *Solum repetere non potest*, ad datum referenda sint. Nam hæc sunt verba *ULPIANI in L. 7. §. ult. Si paterfam. factus solverit partem debiti cessat SCtum; nec solum repetere potest.* Nec officit secunda eorum objectio, quam ex *L. 9. in pr. ff. eod.* colligunt, imo potius nostram sententiam firmat. Utraque enim *Lex* tam 7. quam 9. est ex *ULPIANI libro 19.* In priori dicitur, quod per solutionem partis cesset SCtum, in posteriori vero, *Sed si paterfam. pignus dederit, dicendum erit, SCti exceptionem ei denegandam usque ad quantitatem pignoris.* Ratio disparitatis in §. seq. patebit.

§. XVIII.

Secundo ista agnitio fieri potest accessiones adjiciendo, v. g. Si filiusfam. sui juris factus fideiussores in pecuniam mutuam constituit, aut pignus

gnus, sed usque ad quantitatem pignoris dunca-  
 xat *L. 9 ff. h. t.* Hinc si filiusfam. 100. florenos mu-  
 tuo accepit, & postea sui juris factus dedit pignus,  
 quod valet 50. saltem, illud pro dimidia parte  
 crediti à creditore retineri potest, nec ad alteram  
 partem solvendam agere. *d. L. 9.* Ratio diversitatis  
 hæc esse videtur, quæ à DONELLO refertur: qui  
 dicit: differentiam sumendam esse ex verbis par-  
 tim solventis partim pignus dantis; Is enim, qui  
 expressè partem solvit, & dicit, se solvere partem  
 debiti seu ejus, quod debet, agnoscit non tantum  
 illam partem, quam solvit, sed & illud debitum,  
 cujus partem se nunc solvere proficitur, ideoque  
 totum, quia pars nisi totius, cujus pars sit, intel-  
 ligi non potest, & pars pro debito & alia pro in-  
 debito haberi nequit. At qui pignus dat, agno-  
 scit quidem debitum aliquod, & dicit, se dare pro  
 debito, non tamen adjicit, an pro toto, an pro par-  
 te, & pro qua parte dedit. Ideo qui pignus con-  
 stituit, illud non dat in solutum, seu ut obligatio  
 extinguatur, sed ad securitatem saltem tantæ sum-  
 mæ, pro qua pignus vendi posset, & ejus volun-  
 tas ad quantitatem pignoris restricta est, & sic ea-  
 tenus tantum solvere velle indicavit, vid. LAU-  
 TERBACH. *in Coll. ad Pand. b. t. §. 21.* Quam sen-  
 tentiam in foro retinendam esse existimat STRYCK.  
*in U. M. b. t. §. 12.*

### §. XIX.

Tertio agnitio quandoque contingit Nova-  
 tione

tionem, *L. 2. C. h. i.* si scilicet filiusfam. paterfam. factus novationis causa eandem pecuniam vel aliud quid stipulanti promittit, aut etiam sine stipulatione pacto constituat, se soluturum, nisi in facto erraverit, putans se ex alia causa debere, quam ex mutuo. Illud tamen observandum, quod in hac agnitione sollicitum esse oporteat creditorem, ne nudis circumstantiis sit contentus, sed expressum novationis vocabulum promissioni inferri curet. Deinde non omittendum est, quod agnitione filii sui juris facti tollat quidem vim & efficaciam *SCti* hujus pro se, non vero respectu Patris & fidejussoris, quamvis rati habitio patris confirmet in omnes adversus quos, nisi *SCtum* obstatet, actio. Jure Civ. competeret. Ratio hac esse videtur, quoniam ut mutuum consistat adversus omnes, ex *SCto* requiritur utriusque consensus filii & Patris, quod fit, cum, quod filius mutuum accepit, pater ratum habet, cum agnitione vero filii non statim concurrat consensus patris. Ex his omnibus, quae dicta sunt, apparet, inutilem esse agnitionem, si filius adhuc in patria potestate constitutus debitorum agnoverit. Hinc, si solverit aut pignus dederit tanquam filiusfam. certum est, neutiquam hujus pecuniae vel pignoris dationem validam esse, cum neque pignoris alienandi, neque pecuniae peculiaris profectus in hunc casum exsolvendae potestatem habeat. Quamobrem licet ipse repetere: non possit ob obligationem naturalem *L. 9. §. ult. ff. h.*

*ff. h. t.* Pater tamen, si nummi aut pignus adhuc extant, vindicare, si vero consumti, condicere non prohibetur *d. l. 9. §. 1. ff. h. t.* nisi pecunia vel res aliqua sub hac conditione donata sit, ut creditori satisfaceret, vid. *L. 3. §. 2. L. 9. §. 1. ff. cod.*

§. XX.

*Quinto* locum non habet Beneficium SCri Macedoniani ex parte Accipientis, si filiusfam. de-  
ceperit creditorem, se patrefam. asserendo vel  
etiam jurando, se a patre seorsim habitare. *L. 1. C. h. t.*  
Hoc enim casu mendaci & deceptoris non succur-  
ritur, quoniam jura deceptis non decipientibus  
subveniunt, modo tamen, ut jam supra in thesi 8.  
dictum est, Creditor doceat, se ignorasse condi-  
tionem debitoris, eamque inquirere non potuisse,  
habitumque fuisse publice pro patrefam. &c.  
Verum hanc sententiam temperandam esse credit  
STRYCK. in *U. M. §. 11.* dicens: quod tantum va-  
lere debeat in præjudicium filii se falso patrem-  
familias simulantis, non in præjudicium patris, cui  
ex sua persona eadem exceptio competit. *L. 7. §. 10. ff. h. t.* nec filius patris conditionem mendacio  
deteriorem reddere potest.

§. XXI.

Sexto non juvat SCrum Macedonianum, si  
filiusfam. studiorum vel legationis causa ad Acade-  
miam vel Aulam Principis missus mutuum accepit,  
ita



ita tamen ut pecunia data sit in sumtus necessarios, v. g. ad pensionem pro victu, amictu & museo solvendam vel emendos libros, honoraria pro collegiis pendenda, licet postea eam in luxum & voluptates citra creditoris culpam consumserit. Creditor autem cautus esse debet & perspicere, ne probabilem modum in mutuo excedat, sed faterem eam quantitatem solvat, quam pater vel mandavit, vel pietas paterna pro dignitate & facultatibus suis non recufaret. vid. LAUTERBACH. in Coll.g. ad ff. b. t. §. 24. & BARBOSA ad L. 5. C. b. t. n. 6. Quid autem dicendum, si filius habere Ephorum, (Hoffmeister) quem Pater ipsi proposuit, & qui probabilem modum excessit, dabitur ne Patri Exceptio SCti Macedoniani? Quam plurimi credunt, quod sic, quoniam ei, quem praefecit, mutui accipiendi potestatem non dedisse praesumitur, cum per illum faterem mores & studia filii formare voluerit; ita ANT. MATTH. disp. de Oblig. 9. ib. 11. Verum contrarium sentiunt LAUTERBACH. ad h. t. §. 2. n. 8. & LUDWIG. in differentiis Jur. Rom. & Germ. in Mutuo differ. 3. lit. H. dicentes, quod dolus praepositi in re mandata magis patri praepONENTI, quam Creditori bona fide cum illo contrahenti nocere debeat. arg. L. 11. §. 4. ff. de Inst. act. L. 5. pr. ff. de Trib. act. L. 1. §. 9. L. ult. ff. de Execr. act. Imputet ergo sibi, quod non meliori curam filii sui commiserit. Ex eo enim, quod actionibus filii Ephorum praefecit,

D                      fluid,

fuit, quod omnes, qui cum Ephoro contrahunt, non hujus, sed patris fidem sequantur, Est enim hic loco institoris tanquam prapositus filii negotiis. Hæc tamen omnia, ut mihi videtur, limitationem quandam merentur, nam si Creditor scit quantitatem pecuniæ à patre filio assignatam, & nihilominus nulla necessitate premente ampliorum dederit summam, tunc imputet sibi, quod modum atque voluntatem patris non observaverit.

#### §. XXII.

Sed quid statuendum est, si filius nolente & invito Patre studia in Academiis tractet, tenetur ne pater refundere mutuam pecuniam, quam ad sumptus necessarios studiorum filius accepit? Respondetur, non expedita est DD. sententia hac in re. Nam alii cum DONELLO *ad L. 5. C. h. t. ANT. MATTH. d. disp. 1b. 22. & Colleg. Argent. Jurid. h. t. 1b. 5. n. 16.* simpliciter negant, eam obligationem, quoniam sola causa studiorum non dat repetitionem, sed voluntas & utilitas Patris, & quoniam non decet, filium seu paterni consilii contemptorem, & voluntati patris reluctantem in sua contumacia stabilire atque tueri. Alii contra affirmant cum GLOSSA, & MENOCHIO quoniam filius hisce non corrumpitur, sed doctior redditur, publica quoque salus inde promovetur. Denique & alii distinguunt cum BRUNNEM. *ad L. 5. C. h. t.* cum ratione Patris, si fortassis filium ad studia aptum semel

mel in academiam miserit, tum ratione filii, si enim excellentissimo ingenio præditus sit, qui aliquando monstrum eruditionis evadere possit, tunc sumtus refundendos esse dicunt, tum ratione disciplinarum, potest enim pater compelli, ut filio primas literas & grammaticam discere cupienti sumtus suppeditet. Tum ratione Creditoris, si hic ignorans filium reluctante patre studiis operam dare, pecuniam dedit, tunc pater teneri dicunt ad restitutionem. Mihi in diversitate harum opinionum sententia *Celeb. LAUTERBACHII in Colleg. Theor. Pract. h. 1.* præ omnibus placet. Hic enim hoc arbitrio prudentis Judicis relinquit determinandum, qui pro conditione, loco, ingenio & fortuna cujusque rem ita temperare debet, ut neque filius refractarius reddatur, neque Pater tenax audiatur. Plura adhuc inveniri possunt apud *ENECKELIUM de Privil. Par. privil. 7. c. 2. n. 2.* circa finem, qui moderamen inter Dissidentes quoque invenisse opinatur.

§. XXIII.

Non inutilis movetur quæstio, an cesset SCrum hoc, si filiusfam. ejusdem beneficio renunciaverit? Affirmant hoc non infimi subfellii JCTi, *ZASIVS Lib. 2. Singul. Respons. cap. 28.* *CHRISTINEUS 3. Dec. Belg. 35. n. 10.* & *LINDEMANNUS in Synops. Exeg. de Constr. mut. c. 1. th. 52.* qui ob sequentes

D 2

ratio-

rationes moti sunt. 1) Quod filiusfam. ex omnibus contractibus tanquam paterfam. obligetur. *L. 39 ff. de O. & A. L. 57. de Re Jud. L. 58. §. 2. ff. Pro Socio*. Ergo etiam ex mutuo obligabitur, si SCto huic renunciaverit. 2) quod multis modis sese filiusfam. hoc SCto privare possit, v. g. debitum agnoscendo, vel solvendo. Ergo etiam renunciatio-  
ne. 3) quod quilibet favori pro se introducto renunciare possit, ergo etiam filiusfam. SCto in favorem suum concessio. Verum omnia hæcce rela-  
quibus negativæ sententiæ argumenta destructum eunt, tanti non sunt, ut à defensione negativæ, quam ut communem & veriore[m] tutioremque esse credo, me absterreant. Constat enim, quod SCtum Macedonianum super causa odii inspicientis sceneratorum sævitiam, qui in mortem parentum incertis nominibus pecuniam filiisfamilias credere non dubitabant, fundatum sit, atque adeo publicæ utilitatis commodum concernat. *L. 1. ff. h. t.* Quis autem renunciatio[n]e Juri publico derogari concesserit, qui non expresse Jctorum effato convinci erroris velit. *L. 7. §. 16. L. 38. ff. de Pactis*. Accedit & illud, quod alii maximopere urgent, filiumfam. eadem, qua mutuum accipit, facilitate ad renunciandum quoque induci posse, & ideo frustratoriam esse SCi hujus dispositionem, cum semper induceret occasionem delinquendi, & vitæ patris insidiandi.

§. XXIV.

Nec ullius momenti sunt rationes in contrarium adductæ. Concedamus enim filiumfam. ex omnibus contractibus obligari, distinguendum tamen erit inter Regulam & exceptionem. Regulariter filiusfam. ex omnibus contractibus tenetur, exinde tamen necessario non fluit, quod legislator ob bonum publicum & rationes modo allegatas, utilitate ita suadente, hunc contractum mutui ex numero eorum extrahere non possit, eique vim & effectum, quem alias seclusa ejus lege sortiretur, in foro denegare. Largiamur quoque filiumfam. multis modis se hujus SCti exceptione privare posse, nam illa facere potest, si sui juris factus, nos vero loquimur de renunciatione facta, antequam è sacris paternis dimissus sit, & hanc pro nulla habemus. Admitamus quoque, quod quilibet favori pro se introducto renunciare possit, verum hoc SCtum non primaria in favorem filiumfam. sed in favorem patris & ipsius Reipublicæ introductum esse constat. vid. SCHILTERUS in Exerc. ad Pand. 27. sh. 70. Hæc sententia tam firma tamque valida est, ut ab illa recedere nulla ratio nos jubeat, imo idem dicendum sit, si Juramento corroborata sit renunciatio, frustra dissentientibus Canonistis. Est namque contra bonos mores, quoniam Juramentum hoc videtur invitare ad insidiandum vitæ patris, in quo

consistit ratio concessæ exceptionis, & ita nutriet peccatum, & malitiæ creditorum indulgeretur. Dissentientium opiniones vide apud FACHINÆUM in *L. 2. Controv. 62.* qui eorum sententiam fovet.

### §. XXV.

Præter hos hætenus enarratos modos, quibus SCtum Maced. tam ex persona dantis quam persona accipientis eliditur, habemus & quosdam, qui ex qualitate Patris ejus efficaciam extinguunt. Et *primo* quidem cessat, si consensu & voluntate Patris pecunia filiosam, credita fuerit. *L. 7. §. 11. ff. h. t. L. 2. §. ult. C. eod.* Ratio hujus rei est ea, quoniam periculum patris cessat, cujus securitati Senatus prospicere voluit. Qui consensus patris ipsi etiam præjudicat, & quoad ipsum SCtum excludit. Eapropter, quod ubi pater consentit, ibi nullum periculum corruptionis metuendum est. Accipimus autem voluntatem tribus præcipue ex modis. *Primo*, Si pater filium jusserit pecuniam mutuo accipere, *L. ff. quod jussu.* etiamsi postea mandatum ignorante creditore revocaverit, nihilominus tenetur, quoniam hic initium contractus spectandum venit. *L. 12. ff. h. t.* nec in quos usus pecunia conversa sit, disquiri necesse est, sed modo jussu patris mutuum datum fuisse probetur. Literæ autem commendatitiæ patris consensum mutui non involvunt. *Secundo*, Si sciente

&

& non contradicente Patre pecunia credita fuerit filiofam. *L. 12. L. 7. §. 11. ff. h. t.* Tacite enim videtur consentire pater, qui potuit prohibere, & pro officio debuit, quod ni ita esset, non continuo velle aut consentire intelligeretur. *L. 142. de R. l. L. 1. §. 20. de Exerc. Al. L. 31. §. 1. de his qui not. infam.* Talis tacitus consensus præsumitur, partim ex eo, quod solitus sit pecuniam à filiofam. mutuo acceptam sine contradictione restituere. Admitto hoc tunc, quum doceri possit patrem sæpius solvisse atque hac consuetudine solvendi filii sui creditores quodammodo securos reddidisse. Ast ex eo, quod pater filio unum debitum contrahenti adseuerit, in alia ejus debita consensisse non censetur. Item in mutuum filii tacite consentire videtur pater, si filium tabernæ proposuerit. Varii enim sunt eventus mercaturæ, nam sæpe lucrandi occasiones inopinato offeruntur mercatoribus, sæpe etiam insignis jactura præter spem ad eos redit, & ideo mercaturam luxari oporteret.

§. XXVI.

*Tertio* colligimus voluntatem Patris per ratihibitionem. Licet enim pater ab initio nec jufferit, nec consenserit, postea tamen ea, quæ acta sunt, ratihabere potest; Patris enim ratihibitio principali mandato absumilis non est, & idem operatur, quod jussus & expressus consensus. Imo omnis ratiha-

ratihabitio retrahitur & confirmat ea, quæ ab initio facta sunt. *L. ult. C. h. t.* Contingit autem hæc ratihabitio, 1) *constituendo*, si pro filio promittit solvere citra stipulationem. 2) *Novando*, si obligationem filii in suam personam transfert. 3) *Fideiussorem dando*, 4) *totum vel partem debiti solvendo*, arg. *L. 2. C. h. t. L. 7. §. 15. L. 8. ff. cod. 5) Tacendo ad literas de mutuo filii missas.* Quod si enim receptis literis de filii mutuo per protestationem in continenti interpositam contractum non improbaverit, illum ratihabere præsumitur *L. 16. ff. h. t.* Illud tamen bene observandum est, quod consensus patris non eliciatur ex chirographo, quod sigillo patris munitum aut signatum est, quoniam nec hæc res fraude caret; Facile enim fieri potest, filium luxuriæ deditum patris sigillo invigilasse, donec illud auferret, & papyrus, vel membranam consignaret. Deinde notum est hodie multa reperiri sigilla eidem familiæ inservientia. Si itaque ex appositione sigilli consensum patris quis colligere vellet, & aliam probationem de scientia patris asserre non posset, rejiciendus erit.

### §. XXVII.

*Secundo* intuitu patris impeditur effectus SCti Maced. si pecunia mutua non luxuriæ impensa, sed in rem & utilitatem patris versa sit. *L. 7. §. 12. ff. h. t.* Cessat enim causa SCti, nimirum metus, ne



ne infidiis filii pater pereat, aut damnum sentiat. Versa autem in rem patris pecunia intelligitur variis modis, puta, si filiusfam. rem utilem patri comparavit, æs alienum solvit, actionem acquisivit, vel in id impensas fecit, quod patris oneribus incumbit, *L. 2. C. h. t.* & ejusdem pietas non recusaret. *L. 5. C. eod.* Exemplum hujus rei esse potest, si filius relegato patre aut longo tempore absente mutuum petiit ab aliquo, ut illud pro sorore sua in dotem daret. *L. 17. §. 2.* Plura exempla extant in *L. 14. L. 17. ff. L. 2. Eod. L. 7. §. 2. de in rem verso.* In quibus omnibus non consilium filii-  
fam. de vertenda in rem patriis pecunia, sed even-  
tum spectamus. Hinc, si pecunia sumta sit non  
animo vertendi in utilitatem patris, & tamen pos-  
tea in utilitatem ejus versa, ex æquitate cessare  
debet SCrum Maced. quæ non fert damno alieno  
aliquem locupletari. Verum contrarium de stri-  
cto jure legimus in *L. 9 §. 2. ff. h. t.* ubi dici-  
tur, quod, nequidem si extant nummi, cessat  
SCrum, & id ex severitate in odium creditoris,  
cujus improbitas non cessat.

#### §. XXVIII.

Sufficiant hæc de cessatione SCri Macedo-  
niani ex parte *Creditoris, Filii & Patris.* Prope-  
remus ad finem, & inquiremus, quomodo ces-  
set istud beneficium ratione *objecti.* Hujus ex

E  
causa

causa locum non habere dicunt plerique fere DD. si alius contractus, præter mutuum, cum filiofam. sit initus. *L. 7. §. 3. ff. h. t. L. 9. C. quod cum eo.* &c. aut si alia res fungibilis, quam pecunia numerata, mutuo data sit. *L. 3. §. 3. ff. h. t.* Nam licet alias quælibet res fungibilis, quæ pondere, numero, & mensura constat, in contractum mutui veniat *L. 2. §. 1. ff. de R. C.* non tamen filiofam. aliud quid mutuo dari prohibetur, quam pecunia numerata *L. 1. pr. L. 7. §. 3. ff. h. t.* Hæc enim præ omnibus aliis rebus apta est, ut leviter expendatur, & ad omnem luxum & nequitiam instrumentum aptissimum est, & ad quævis mala perpetranda irritamentum. Hæc tamen cum grano solis accipienda, quoniam tantum vera sunt, si nulla fraus SCto huic sit quæsita. Nam si quis in fraudem ejus aliam rem fungibilem, quam pecuniam, e. g. oleum, frumentum filiofam. mutuo ita dederit, ut rebus his distractis pecuniam nancisci queat, vel etiam res aliqua ipsi sit vendita, ut ille exinde pretium redactum habeat in vicem mutui, utitur filiofam. SCto Macedoniano, *L. 7. §. 3. ff. h. t.* quoniam dicitur Mutuum Palliatum aut Contractus Mohatra, quod Judæis non incognitum est, & de quo videri potest ZIEGLERI *Dissertatio de Mohatra.* Sic etiam in SCti fraudem factum censetur, si Mercator merces nimis pretiosas vendidit filiofam. vel si cenopola vinum, cerevisiarius cerevisiam, cupediarius cupe-

cupedias ultra probabilem modum & solummodo ad luxum concesserit. Hinc etiam peculiari-  
bus statutis in omnibus fere Academicis, ne ma-  
teria peccandi malis moribus præstetur, certi li-  
mites, ad quos usque tales homines credere de-  
berent, constituti sunt, & severitas SCi Mace-  
doniani ad alios contractus producta est. Huc  
præter alia variarum Academicarum statuta, quæ  
STRYCK. in *Ufu Mod. h. 1. §. 2* recenset, meri-  
to quoque referenda est saluberrima *Argento-  
ratenſium Ordinatio Politica de Anno 1708. p. 47.*  
quæ vult, ne caupones, cupediarii &c. de po-  
culentis & esculentis civi academico ultra dimi-  
dium floreni ullam fidem habeant, & si habue-  
rint, non audiantur.

§. XXIX.

Coronidis loco unica adhuc quaestio venti-  
landa venit, an nimirum SCtum Macedonianum,  
prouti in foro externo, ita etiam in foro interno  
cesset? id est, num filiusfam. in conscientia non  
obligetur ad restitutionem mutui? Varie hac de  
quaestione judicant DD. Illi, qui affirmativæ sen-  
tentiae adherent, sequentia fundamenti loco affe-  
runt. 1) quod SCtum hoc summa æquitate nita-  
tur, & omnis lex æquitatem concernens etiam  
in foro interno servanda sit. 2) quod SCtum hoc  
introducitur sit eam ob causam, ut malitia Cre-

E 2

dito-

ditorum puniatur, imputet ergo sibi, quod contra leges crediderit, hinc qui culpa sua damnum sentit, non censetur damnum sentire. Ita sentiunt præter LAUTERBACH. in *Colleg. Pand. h. t. § f* HAHN. ad *Wesfenbec h. t. n. 2.* ZOESIUS *h. t. n. 6.* alique. Verum his non obstantibus inveniuntur, qui negativam mecum fovent sententiam, asserentes, filiumfamilias in foro conscientie utique teneri pecuniam mutuo acceptam restituere. Rationes, quibus moventur, sequentes sunt. 1) quod obligatio naturalis per SCtum Maced. neutiquam extincta sit, imo ipsa *lex 10. ff. h. t.* proficitur, filiumfam. manere naturaliter obligatum. Secundo accedit & illud, quod si filiusfam. semel solverit, solutum repetere prohibetur *L. Sed si pater §. ult. ff. h. t. L. 40. ff. de Cond. indeb.* Certe si naturaliter non esset obligatus, soluti repetitio locum haberet, præsertim cum condictio indebiti tories institui possit, quoties solum est indebitum naturale. *L. 10. de A. & O.* Illud tamen non nego, quod, si creditor sciens in luxuriosos sumtus subministraverit pecuniam, ob fraudem creditoris etiam filiusfam. in conscientia tutus sit, nec ad restitutionem obstrictus.

T A N T U M.

V411521132